


東江集鈔

東



序

華亭友弟蔣平階大鴻父

自吾黨諸子以文章聲譽交於四國四國賢豪莫不起而應之而風尚之尤合者無如西陵故雖相去三百里而遙而酬對若在几席世變後尤致力於古文詞厥有西陵十子與予特善沈子去矜則其一也猶憶壬辰癸巳間張筵高會去矜幅巾方領揚觶登壇姿度閒暢嗣後予頻年訪道而麗京亦逃禪入粵荏苒二十載離羣與歎良會永乖一日張子祖望以去矜之赴告且謂與虎臣錦雯後先卽世嗟乎何老成

之凋謝一至是也天官家言近者文昌失次才士當之卽以西陵而論自魏美喪後吾道甚孤寥寥縣寓又安得英絕領袖者相與鼓吹大雅哉沈子所居爲臨平湖其山以唐高士丘丹得名而褚無量亦讀書其上今此名勝又屬去矜信山川之靈時一發泄而去矜儲精斯壤宐及此盛年抱書挾策首應嘉招以荅天瑞何乃年方服政遽爾溘然茫茫理數亦有不測識者耶且沈之先世有令名秩參文武厥考復以方技擅能嘗濟人於厄旣以德惠產此亢宗是將大食其報而去矜文行並高刻勵向學擇交取友儻

然自異於流俗守不字之貞者三十年易稱乾之初九確乎不可拔者去矜有焉今其作述雖存而典刑已邈吾黨同好所爲呼告巫咸而重爲之傷悼者也去矜博綜羣言百里之內問奇者交錯於道所著東江集詩賦古文詞曲雜著如千卷向爲都人所傳誦其未卒之先又手自成編煒然可觀予恨未遑卒讀而聞其令子聖昭輩盡破中人之產亟謀剗剗竊歎非此父不生此子去矜真不歿哉丙辰初夏令子屬予友于畏之寓書請序于予并示毛子穉黃所撰誌銘予發函伸紙涕潛潛下獨喜去矜不朽之作遂得

東江集  
行世而令子之善繼善述又有足稱者向者悲痛之情聊復爲之少自慰乎

序

西陵同學弟陸圻景宣氏拜撰

沈子去矜九歲能爲詩度宮中商投頌合雅其天性然也乃其風氣間喜溫李兩家崇禎辛巳予以華亭陳給事詩授之沈子特喜于是去溫李之綺靡而效給事所爲卽沈子詩益工尋漢魏之規架蹈初盛之風致內竭忠孝外通諷諭洵詩人之隩區也乃今彙其所撰詩文號爲集鈔其意貞而不濫其聲和而不肆蓋雅之未降而風之未變者是沈子之詩之所托也雖然沈子所居臨平卽古東江地與婁淞並稱十

年之間沈子以詩霸吳越乃合郡城稱十子而又與毛張號三家東江旣入錢唐底定蓋泱泱大國風乎

序

東江沈謙去矜與予年相若當卯辰間兩人俱弱冠予時病臥清平山中去矜就訪余且贈以詩予望而遽霍然起謝曰讀子詩已療我煩醒之疾而親其人且飲我以瑤漿之涼子殆示吾天壤而吾之機發于踵子不從人間來邪然去矜家臨平湖余在會城與酬對日少一日過把余臂曰時殆矣予家東鄉有園林池臺之勝足可遊陟藏書百卷可自娛種魚賣藥可以養生俗樸而信可以爲城予且治十畝之桑聊與子逝行有緩急其母忘予所云東鄉焉予曰諾未

幾臨平盜特起縱火焚畧比屋之廬蕩狀凡事不可  
豫料類如此今去矜且修復故廬讀書養魚兼通靈  
素之術自活語無不驗獨所云園林池臺者化爲烟  
灰夫事弗可知者人也而可先期自斷决者心也去  
矜能使語毋弗驗蓋素所立志然也比歲事稍定與  
去矜數徃還每遡舊事以爲悲笑今去矜東江集鈔  
成要予序之復贈詩曰古人不我顧來哲方益邁齊  
名昔所嘆相視疑千秋予惟去矜志潔行芳而骨體  
修雋故吐詞清拔時復綺思其體則上溯漢漻下泛  
唐波操律比韻卓然先軌宛轉幽詣復見新妙予向  
論如是亦人人共推目之也第憶予昔居山中時客  
或過問曰此山名清平耶予曰此名東山客詫復問  
予曰吾臥于此寧非東山此自少年藉時平晏易狂  
耳今且糾纏塵務摧剗剛蹤追念昔懷不復可得而  
去矜遠迹東湖寄興觴詠自予望之便如龍豹驂行  
且不逮而猥云齊名哉此自去矜誣予若予終已不  
能論定去矜文聊著平昔意氣所托相取本末因是  
或亦足以見去矜云

順治乙未春日同學弟錢塘毛先舒稚黃拜題

序

沈子自鈔其文集問序于予予曰子文上溯騷賦下  
迨填詞鉅束盈數尺矣寧止于是乎沈子曰文之美  
惡不在多寡古有累牘致譏一言見賞愚鄙自審來  
賢正繁某於此有懼焉矣予喟然歎興而言曰沈子  
聞道乎哉吾始見沈子年纔十九齡耳爲戊寅之春  
今踰十有五年其學彌進其心愈卑豈所謂博而思  
約者耶沈子孝友性成勵志敏學雖鶉衣魚釜不以  
改其樂其才實有大過人者予雖忝竊師資冰藍自  
畏乃今鹿鹿塵埃老無所成卽思秉燭追踪良無及



東江集鈔  
矣又烏能序其集哉雖然學如登山進而益高沈子  
質美行芳詎止以辭賦爭千古其更窮夫道德淵微  
之際文以載道德以立言豈不爲儒生之極詣乎予  
故日夜望焉矣沈子名謙字去矜杭州人居近臨平  
湖古東江也稱東江子云

順治壬辰夏五月鹽官友人祝文襄撰

東江集鈔目錄

第一卷

賦三首

風雅體三篇

四言古詩二首

擬古樂府四十六首

古樂府二首

五言古詩十三首

第二卷

五言古詩四十一首 七言古詩十九首

第三卷

五言律詩一百二十首

第四卷

東江集金 目錄一  
七言律詩九十二首

第五卷

五言排律十三首

五言絕句十九首

六言絕句四首

七言絕句五十首

第六卷

序十一首

記五首

第七卷

書四十二首

第八卷

論四首

募疏二首

啓三首

傳二首

墓志一首

祭文二首

考一首

說三首

第九卷

雜說二篇

共一百二十九則

東江集鈔卷之一

仁和沈謙去矜著

長樂郡  
沈謙書

門人潘雲赤夏珠  
男聖昭弘宣較

賦

太湖望雪賦

歲聿云暮晡藹窮陰爰浙瀝而集霰加颺戾之廻風  
慨遠遊之未旋叩舲窓而悲吟賦曰惟震澤之瀟滢  
兮導三江而奠之跋禹功之足尚兮亘萬禩而若斯  
郡邑包而糾盤兮巖巒鏡而萃嶽何雨雪之麇麇兮  
日無精而西匿歟浮雲之互馳兮二儀闇而合并行  
旅阻而邐遳兮優鴻鴈之南征撓人噤而墮指兮斧

東江集金 卷一  
隆冰之嵯峨目搖搖而凝睇兮駭積素之亡厓紛吾  
面以浮浮兮又回灑而緣隙聲蕭瑟而盈耳兮波震  
動而溟濤御狐貉而失溫兮薪就濕而罔熾憂不堪  
而歎悲兮嗟我僕之况瘁余昔好此弘覽兮邁各區  
而敖遊睇林屋之窈窕兮羨靈威之冥搜瞻瀾漫而  
不分兮疇要離之墓埏抱流光而如月兮吁大夫之  
不還城闕改而丘荒兮吾詎怨此轍軻湖閱世而常  
在兮悵富貴之或假繫孤檣之不利兮怛十進而九  
回聊飲醇而發歌兮昭余志之獨悲歌曰峻岑偃伏  
水炭漫兮太陰四塞光益煥兮隨風流豔入我衣兮  
荒忽慘怛攬離懷兮馮舷游目涕沾裳兮曰歸曰歸  
瞻耀靈兮

瑞竹賦 并序

竹金色嵌碧節節勿之爽司空祝先生携自嶺南  
家君植于堂踰年生竹咸碧節節嵌金亦勿爽武  
原磊庵吳公聞而嗟曰此近于瑞矣遂以名吾堂  
姚太學叔祥爲記謙亦續獻斯賦曰  
惟碧鮮之美質兮肇孤根于炎州奚孔翠之足貴兮  
竝合浦之明珠踰五嶺之崑崙兮泝江漢而不遐豈  
殊土而改節兮亦紛披而容華方浮筠而未同兮詎

東江集金 卷一  
梁池之足擬嗟君子之可親兮遵吾堂而萃止振雅  
音于鐘磬兮耀金玉之異相旣栗然而生色兮錯縹  
青而不爽伊踰歲而未久兮歛金光而變綠方息駕  
于澤中兮旋弭節于淇澳觀者駭而謳吟兮勺醇酒  
而從容感亭毒而改視兮天亦巧昇夫茲繁僉日和  
氣之致祥兮故嘉蔭之在御益厲姱節而勿懈兮豈  
直警戒之足懼比堅貞之偉幹兮效儀禮之象鈞凌  
巖冬而停雪兮紛寒風而遘春跂厥子之若珠兮儻  
神鳳之來食娛吾親而噉辭兮尚培灌之是力

碧雲賦

伊登樓而縱目矚返照于高林意嶮廓而無侶悲遠  
遊之滯滌鴈嘈嘈而過余草變衰而將翳旣徙倚而  
增欷感涼颼之颼戾爾乃碧雲暮合欲卷旋舒輕如  
綃縠粲若夫渠迎晚霽而含紫鑑清池而上綠俄汜  
濫而嬋娟亦紛紛而斷續列城郭以周圍駭魚龍之  
翱翔睹斯物之易變歛吾鬢之已蒼扈起滅而無心  
悲夫人之自縛履康莊而欲馳何舉足而如躓勃焉  
而興渙焉而散征蒐逐之而忽揚離憂遭之而遂滿  
孤雲逝而何依日已落而星出望故山于杳冥目眇  
眇兮首疾淚將零而復含邈悵快之難畢寫吾愁以

東江集金 卷一  
載歌蚤應候而啾唧歌曰碧雲容容兮慨余歸之無  
期延首眺遠兮淚并下若綆縻安能假六翮兮追秋  
鴻而迅飛

風雅體

○園有椅

序曰園有椅贈友張子綱孫也

園有椅室有莎

蘇回切

伊誰與偕

堅奚切

我有旨酒聊可

寫憂

於希切

○園有竹室有菊伊誰與勗我有素琴聊

可為樂

虞谷切

○鼓琴鼓琴厥維鏗爾有酒有酒厥惟

馨爾○東江滔滔我歌子謠秦亭峩峩我謠子歌

園有椅四章二章章五句二章章四句

神之來

序曰神之來禱雨也

神之來

陵之切

其雨霏霏君子攸宜○神已醉靈雨其

沛

隊叶

嘉穀成實

脂利切

○神乃起

口舉切

滂沱其雨曾孫

錫嘏

果五切

神之來三章章三句

仲秋

序曰仲秋祝詞也

仲秋維百朔日甲寅

以脂切

錢唐洋洋增而遠期○溫

東江集金 卷一  
溫吉人維德日新增而遠期匪降自天鐵因○佩玉  
有節鏗鏘磬管觴酒再行式燕以衍

仲秋三章章四句

四言古詩

贈俞氏

美玉在懷用爲國琛洪鍾在虞中含至音我友尚德  
棲于中林履道集祥天亦可謀

其二

荷衣籜冠慎言雅步積久愈宣詎苦遲暮蛟神蟠淵  
豹文隱霧時之所需于公何慕

擬古采府

皇娥歌

元寂寞莽蒼蒼二氣和洽萬靈翔乘桴窈窕窮滄  
流精冥冥驅景光高張梓瑟會神皇延壽萬年何  
可忘

白帝子答歌

天地開闢杳難測水光日景來相逼鳴機夜罷璇宮  
織清歌撫瑟通消息光采昭昭表玉質心知所重期  
明德流連滄浦難終極

引聲歌

外極莽蒼內葆精粹至人不言四時咸備理不出身  
道不在智形體塊然神明所寄虛心實腹抱道守真  
大化廻薄與仙者隣運幹圓象敷匝廣輪陰陽不害  
庶得平均

同聲歌

肅志奉巾櫛俯仰被輝光不棄葑菲質來躋君子堂  
嬉笑極和悅中心恒恐惶洗手理槃榻懼君不見嘗  
重池繡君衣懼君厭舊章丈夫若青松女蘿苦不長  
周旋旣黽勉斟酌每自量鷄鳴勤勸戒衿帶助矜莊  
左右協明德寧敢階樂方賤妾慕高義逢君重大綱  
顏色或蕉萃志氣亦芬芳托體倚太山萬年樂且康

妾薄命

月旣出矣嬋娟復陳組幃象筵雕爐玉蕤紫烟魚膏  
白鳳夜煎持杯密坐周旋作使碧玉名倡會者幽通  
獨傷斟酌酒非沙糖齊見玉顏舒光何者善爲樂方  
知音識曲周郎佳人起舞婆娑被服雜繡織羅再奉  
妍唱清歌瞻視盤桓態多雜佩芳馨自矜合坐翟瑜  
罷毘欲悉蘭思未能明珠翠羽不勝能者流連蘊蒸  
手持淵客珠盤錦有交龍博山寶有璆琳琅玕奉之  
坐者感嘆大義深情別難夜促高會未知起視列宿



東江集金 卷一  
參差東方須臾高之客與主人長辭

行路難

奉君繡楠盤龍之寶殿青牛丹轂之香車蒲梢吉量  
之名馬白台絳樹之容華世間富貴亦有盡人生恩  
愛非無涯願君勿悲歌我歌我歌行路真可嗟不見  
昔人意氣盡紛紛麋鹿遊館娃

其二

當日蔡邕製此焦尾琴金徽隱丹漆取之爨下良苦  
心奉君玉手清夜弄帳中膝上恩義深初奏紫庭之  
大曲再鼓白雪之高吟一朝絃絕君不御棄置寂寞

無知音

其三

美人遙夜開金堂輕軀緩步搖明璫含情凝睇如不  
樂博山火冷銷都梁統扇團團象明月羅衣肅肅愁  
巖霜人非一身誰不別攬此盛年情莫當不見芙蓉  
猶並帶下有比翼雙鴛鴦

其四

熊膽搗麝白其中辛苦當自知壽命亦有限今胡戚  
戚多所思歌舞以解愁悲歌緩舞反增憂念我時運  
太輒軻停杯俯首涕泗流

其五

君不見河中水白日東流夜不止君不見園中花全  
盛護簾幙零落委泥沙人生迫促亦可憐今日白頭  
昨少年兒齒齡背不相恕清酒漿炙須流連與爾爲  
歡慎勿晚努力鼓吹彈朱絃從來祿命有定數爾我  
俱當聽自然

其六

停杯坐長嘆憂從中來不可斷似我少年劇可危况  
乃逢時正離亂定當隱深山用以避急難父母各和  
順隣里通呼喚夫妻共舖糜子女免流散古人有才  
尚寂寞我身何况非楨幹

其七

暇日聊寫憂驅車上高岡高岡何崔嵬纍纍如北邙  
桐梓生冢傍中有二鳥名鴛鴦傳是蘭芝與仲卿幽  
竟變化多感傷毛羽豐茂成文章同聲比翼相翱翔  
有如夫妻不暫忘可歎人生冤苦有如此令我感激  
心彷徨

其八

玉樹何離離棲宿雙飛翼一雛投網暮不歸使我不  
飲亦不食秦川佳人見鵲悲停梭惆悵雙淚垂憶昔

東江集金 卷一  
初嫁顏色盛自謂恩愛終不移豈知日月有盈缺人  
生邨得久芳非回文欲寄恐腸斷手寒自擲流黃機

其九

造車作方輪九牛力盡推不轉追思昔年初見時比  
肩加膝偏依戀焚香持告天但願世世常相見誰知  
顏色逐年衰自應恩義隨時變每觀舊物使心悲還  
君七寶畫團扇

其十

君不見楊柳若青絲秋風搖落無長枝金龜才子玉  
窻女紅顏綽約難久持竟鬼一朝散北邙墳冢空纍

松門垂露滴鬼火石臺月出鳴狐狸翠鈿寶梳已  
零落黃塵白骨相離披君今念此不爲樂會須大藥  
尋安期

其十一

君不見見雨雪下長川智者不能再上天君不見琉璃  
璧玉碎良工難使更完全細觀萬物理如此此身死  
去應亦然生時華屋尚不好死後形骸蓋荒草舉頭  
不見心所歡更無酒壚可傾倒勸爾加餐須努力日  
月無情遞相逼對君欲歌行路難但恐聞之淚沾臆

其十二

前見草青今草黃前見春暖今秋涼獨君從征不思  
返邊塞流年豈易忘憶君當時與我別含情執手臨  
河梁勸我忘憂且減愁功成不久當還鄉豈知一去  
五六載昔爲雲雨今參商奩鏡生塵久不照床幃宿  
火猶聞香我心憂愁君不知君身苦寒妾念之關山  
雖是少音信秋深那能不寄衣

其十三

邊庭雪霜何霏霏我今懷歸心苦悲昔我奉命來戍  
邊家中有妻方少年初謂暫別不久歸豈知王事偏  
羈遲錦衣猶是別時作今已零落多脆絲每欲脫身  
返鄉里大義豈得顧所私恩愛久已絕此生相見知  
何時乃有客從長安來附書一札兼寒衣書中言詞  
一何苦道妾與君生別離亦知戰場路遙遠山川迢  
迢會面稀死則黃泉各相見生當來歸同舖糜封侯  
區區不足戀閨中紅顏日欲衰香膏金翠皆棄捐雲  
鬢花容非復前君看寄來衣上淚念我少年當見憐

其十四

君不見河朔遠遊客驅車晨上太行山雪落霏霏谿  
谷暗泥塗崩劣一何難車輪摧折不可駕人馬躑躅  
層崖間腹中饑困手足凍茫茫四顧空長嘆人言此

東江集金 卷一  
路苦人心尤險艱世上康莊亦無限此處不得久盤桓

其十五

君不見昭陽殿飛燕留仙今不見君不見西陵田靈  
衣寂寞無管絃富貴榮華難久留昔時華屋今山丘  
君看白骨露青草當年萬乘稱王侯生時有酒各盡  
醉慎勿鬱鬱懷長憂

其十六

君不見水上萍遠近何青青雖得暫相合瞬息仍飄  
零聚散皆偶爾何須悲喜勞心形從今去住各不戀

不用此保遐齡

其十七

君不見城南美少年被服紈綺麗且妍須臾年紀忽  
邁逝白髮零落口流涎高堂明鏡有分別今我少年  
真可憐

其十八

世事有凶吉窮達無他術古人三十稱壯年我今二  
十已加七當此喪亂多憂思窮途轍軻難具悉擬此  
行路難聊抒憂憤開悴顏林中虎豹厲如鬼江中波  
濤高若山作此自勸還自誠回憶周道起長嘆

濟濟篇

高歌大舞心浩昌比蹤舜禹尊陶唐遠如期樂未央  
遊心養志大吉祥日西沒月東生但當酒歌時太平  
不作樂反多虞人生戚戚一何愚山樹高鬱叅差春  
秋雨露華葉滋感恩德世長久高歌大舞祝老壽

淮南王篇

淮南王好神仙金堂玉柱期千年神經丹訣錦作囊  
手持鳳腦調瓊漿調瓊漿飲宓如宓宛轉動羽衣  
翠華髦節揚金支我欲涉江江水深不能采芙蓉空  
沉吟空沉吟自嘆息徘徊悵望苦心無極繁音妙舞  
雖可喜徘徊心思舊鄉里

野田黃雀行

野田黍離離野田黃雀肥幽人語黃雀慎莫城南飛  
城南少年子挾彈忽相追黃雀仰頭答我爾君亦然  
烏生八九子乃死桂樹間桂樹非不香不如野田強  
前有一罇酒行

高堂羅象筵大會列主賓簫笳動繁奏圓方充八珍  
妍唱激陽阿妙舞迴縈塵促席還跽拜慊慊前具陳  
醉酒亦易醒飽德懷千春

車遙遙篇

東江集金 卷一  
車遙遙兮馬駢駢君之出兮薄長馳君何往兮北至  
燕願爲軾兮在君前君下車兮軾不御願君長在車  
上駐

昔思君

昔君與我兮如形隨影今君與我兮如瓶落井昔君  
與我兮磁石引針今君與我兮絲絃脫琴昔君與我  
兮山陵不移今君與我兮霜露易晞

捉搦歌

鷓子高飛捉百鳥快馬着臙須茂草男兒作健腹不  
飽老女不嫁自言好

其二

華山山頭九曲路前頭步行後頭顧綵袂裙子黃皮  
袴可憐男女會一處

折楊柳歌

放馬孟津上楊柳若青雲何人坐吹笛故使行客聞  
其二

楊柳鬱葳蕤喜得快馬騎黃塵共蹠跋知是誰家兒  
幽州馬客吟歌

快馬莫苦瘦兒莫苦貧馬瘦行步工人貧意氣真  
高陽樂人歌

下馬入酒店可憐當壚子但飲不索錢親熟無彼此  
輿儂歌

歡在九重閣輿惱不可止三月桐始華幾時見梧子  
其二

可憐三千里衣綻不能縫張帆下牛渚長江愁殺儂  
讀曲歌

感歡好情懷一見相憐惜搏泥作高山但恐不是石  
其二

送歡出大門門前聞馬嘶柝籥照蠟燭流淚爲分離  
其三

欺儂儂不知可憐久蒙蔽梳頭入黃泉汝自有鬼髻  
其四

離別經十日忽如踰三秋燈燼暗春麥欲麵更無油  
其五

園池四五月荷葉始參差不惜更少待終有見憐時  
其六

日日望減愁愁思日益大蓮子語敗橋心苦那得過  
白附鳩

送郎新亭路酒似珍珠紅可憐飲不多自有桃花容  
作蠶絲



采桑往北園素手攀青枝却喜逢着歡那得顧蠶饑  
大道曲

巍巍佛國門大道若天衢不知白日暮車馬正馳驅  
五言古詩

雨中西陵橋泛舟至湧金門詩

微雨映朝日輕舟蕩寒烟不悟山色佳却與幽性便  
虹梁鎖深翠花塢含晚妍鼓檝翻浪蕪鷗鳧起翩翩  
南國綺羅歇萬古空嬋娟寶釵變黃土尚憶同心言  
佳麗亮難久幽憂詎能宣義駕不我貸行樂及盛年  
中流振哀竹坐客淚如泉

代陸司馬伎

天寒月華薄青桂正含芳誰知獨宿夜流影照空牀  
自君歸窮泉憂思毒我腸涕淚應聲落蓬首自飄揚  
豈必無膏沐容華心所傷玉管生紫塵宮商安復詳  
總帷隨風啓彷彿見輝光青鐙闇無精屏營以彷徨  
君容寧可睹妾悲殊未央

情詩

志士多憂思孤鴈多悲音我行將安適江路阻且深  
親昵餞遠道涕下沾衣襟傷彼併肩獸尚復思故林  
天涯遙相睇誰謂憂可任斗酒不爲薄鉶聲當復斟

其二

嘶馬出國門環鞭與君辭我行豈云樂生離有餘哀  
永念平生親流涕如連絲况復多陰霖行潦成汙池  
駑馬已云罷欲進忽復遲聊復稍盤桓故鄉猶可踰  
前路邈何極憂念生狂癡

其三

高臺薄蒼天日夕悲風興軒窓啓四戶曠望凌百層  
圓景皎夜光文昌低玉繩拊劍發長嘯涕淚沾我膺  
游觀以解憂彌令心蘊蒸慷慨進美酒安復計斗升  
故鄉在東南馳情念良朋我亮無六翮焉得遽飛騰

閨情

晨露被庭蘭翩翩華葉滋芳馨散綺疏照耀三重階  
上有雙飛禽鳴聲何喈喈豈不愛榮華久要千歲期  
秋風率復厲忽隨衆草萎春華以零落佳人胡不歸  
攬鏡傷盛年紺黛爲誰施蟋蟀響空房悲聲間鳴機  
流黃日成匹裁縫將寄誰必得瓊樹枝慰我饑渴懷

郭店鎮

北斗在平地曉發西蕩灣身如東流水一去何時還  
樹隔禦兒涇雲沒桐扣山起視萬感集青髻爲之斑  
津梁一夫守在道數里間沙翻若湯沸日湧如血殷

男兒絕可憐。性命同草菅。我昔北窓臥。桐陰下重關。  
林鳥時一鳴。流泉正潺湲。冷然鼓玉琴。不負虛室閒。  
轉瞬殊否泰。觸熱冒嶮艱。

黃山

游魚慎躍淵。棲鳥解擇木。况余烟霞志。久思逃空谷。  
卜地又南徙。凌晨促僮僕。刺舟渡前溪。朝陽見霖霖。  
溜溜趨澗泉。修修惹雲竹。田婦饁自携。漁蠻網新櫛。  
桔槔互翻踏。羊豕同放牧。環山十餘里。數姓皆聚族。  
睹此風俗淳。轉覺人代速。許公守淮陰。臥閣省鞭朴。  
故宅尚未荒。衡門但松菊。後具崇隱德。出入常卉服。

慨然哀我窮。分宅增版築。牀席安我身。鷄黍飽我腹。  
毋將白髮梳。兒取文選讀。我生實軼軻。福性類麋鹿。  
誰能艱難際。交誼尚敦睦。昔慙蘓門歎。今免嗣宗哭。  
永辭郡邑囂。從子抱牛犢。人生無良朋。何以慰窮蹙。

文昌閣

山色向暝佳。升丘披榛莽。柏廷含宿雲。龍穴發新土。  
層梯上飛棟。干峯照窓戶。奎壁有餘輝。七星燦可數。  
嗟哉俎豆荒。偶爾精靈聚。地迥無人聲。松濤颯如雨。  
樵唱晚來稀。谷中嘯饑虎。徒旅慘不歡。令我毛髮豎。  
傍地竹兔馳。號客山鷄舞。荒落難久留。携杖出村塢。

西垞

循溪回悲風西垞廢已久暗水生碧蛇赤日照枯柳  
拱鼠不避人簡書壁魚走廬江兩垞主傲世日詩酒  
至今遺墨妙屏障盤蝌蚪左徒蘭竟鋤中散竹烏有  
千古猶致思吟嘆滿人口楚民尚歌德此地卽峴首  
綿綿垂世範太上期不朽

靈泉井

海濱皆斥鹵遠汲瓶自携爭水若醍醐一石五斗泥  
口燥時荷荷悵然心煩迷月公湯休徒邀我尋招提  
東踰赤土嶺石理如虹蜺山廻野寺出列柏自成蹊  
靈泉凝玉膏陰竇風淒淒古德昔應兆香美孰與齊  
一泓沸未已幸不爲涔蹄安平若翻雪遠隔浮雲西  
繫思豈勺水掩面增酸嘶

龍尾山

我主歌蒿里伐喪有鹽徒嘯聚南山岡其禍將剝膚  
婦孺過壞垣劍戟羅長塗擊柝星月底啼鸚兼鳴狐  
有備幸舍去善後無良圖賈生亦賦服我留將何需  
夜過龍尾山蜿蜒入平蕪我來榴正花我歸蒲已枯  
旄丘感時物千古同悲吁

同虎男宿台柱館舍賦此留別

東江集鈔卷之二  
步月歸東城論心愛今夕衆星低復昂河影如曳帛  
登樓發高唱頓使沉憂釋吾非歌五噫子實望三益  
著書何用多精義必尋繹遲暮空悲哀反爲年少惜  
東湖有故廬雅志在泉石畦稻秋漸肥堤柳晚更碧  
安能風塵際俯首作殘客鱸膾若花紅松醪如月白  
野航濬湖臺褚公有遺跡何時携手至言笑未遐隔

東江集鈔卷之二

仁和沈謙去矜著

門人沈豐垣通聲  
男聖時會寧較

五言古詩

擬古詩

皎皎窓中月熒熒庭下蘭獨處怨遙夜屏營發長嘆  
我君在天末軒車何時還安得雙鯉魚勸之強加餐  
加餐慰我情爲君結重關

其二

四坐羅衣冠娛心及今夕况有賢主人謙謙愛賓客  
簫笳多哀音圓方若山積歌舞未云疲行觴起前席

東江集 卷二  
念昔同門友零落逝安適  
新交若雲興樽酒競相索  
當歡有餘悲哀子久窳  
安言笑尚可追歲序忽已易  
何不乘少年天衢振高策

其三

蕙蘭多光輝采采不盈手  
佳人遠行遊無用耀蓬首  
寄君爲雜佩薄爾未爲厚  
道遠馨香歇恐君不復取

其四

崔嵬上北邙墳冢何纍纍  
珠襦與馬革共盡知阿誰  
朝見烏鳶飛夕聞狐狸悲  
信誓匪不堅誰爲同棺灰  
長嘆內傷心富貴亦何爲

其五

冬日常苦短寒風促頽陽  
鴻鴈逝南陸蟋蟀鳴東廂  
遊子在遠道念之毒我腸  
野獸尚索羣百鳥猶雙翔  
往昔初結昏恩義豈可忘  
願君克有終芝蘭會重芳  
安得假六翮凌風至君傍

其六

西巴佇妍唱雍門罷哀彈  
賤子歌一言嘉賓勿遽還  
我有錦繡段光耀勝齊紈  
上有比翼鳥下有並蒂蓮  
旁緣結不解中着同功綿  
織作良不易巧婦且悲歎  
物物各不同種種自相連  
贈君爲上襦聊以禦冬寒

冬寒有時盡捐棄復何言

其七

僕夫戒前綏行役別親故人生難常守哀子就遠路  
同袍而乖違氣結欲誰訴京洛多衣冠新交索良晤  
將無漆中膠忽作草間露亮君愛玉體幸保金石固

其八

行行從軍歸故廬猶復存墻垣附女蘿荆棘塞我門  
鴟梟鳴中堂猿猴追後園棟戶不復依東厨斷炊烟  
所親死已久覓鬼知我還一身脫戰場猶幸肢體全  
辟彼秋蓬飛偶爾着本根窮獨以終老愴愴摧心肝

山居

昨辭郡邑遊歸就田園居早穫旣已畢比舍停役車  
天澤幸不偏大小各有儲蒼茫十月交霜寒林木疎  
墟烟暮曖曖落日照我閭牀頭酒應熟喚婦羅前除  
彈我匣中琴讀我枕上書亦知爲農樂富貴復何如

夏夕同郎季千宿張祖望寓舍納涼有作

初月生東山涼風吹我衣芳蘭揚其香誰當遺所思  
故人有斗酒呼我斟酌之哀歌斷人腸何用竹與絲  
髣髴忽欲變媿非璠璵姿醉飽日以困富貴來何遲  
執熱必洗濯悵悵方獨悲流螢隱叢篁滌魚唼陂池

東江集卷二  
感汝慰煩渴贈我瓊樹枝保此良宴會弗使長乖離  
答鄭氏成文

別子忽五年新詩乃更清暮見雙飛鴻銜之墜我庭  
前跼讀未畢躑躅以屏營九日發高唱結袂皆俊英  
傾觴薦秋菊絲竹遽哀鳴企足眺江介忼慨慕遠征  
子固達士懷亦復傷其情余胡在空谷采蕨苦不盈  
無因與良會出入分光榮仰視黃鵠飛奮翅起青冥

贈俞氏

虛堂啓中夜行杯奉嘉賓絲竹有餘樂肴饌錯雜陳  
君胡不遑食促席叙苦辛哀君念同生摧藏失所親  
枵萼共一枝手足共一身奈何隔幽明忽爲參與辰  
沒者保令譽存者愴心神時日亦已促人生若飛塵  
豈必皆壽考賢者能日新咄嗟將何爲乃亦兒女仁  
蕙蘭不重芳蛟龍寧易馴君亮愛高義積久莫苦貧  
援筆聊慰勉努力識所遵

阻雨寄柴虎臣毛稚黃虞景明

春雨何冥冥浮雲互相踰童童蔽長路車馬不得驅  
故人在西南高視綜羣書陽春一以奏下里徒紛如  
伊余苦俗累悠悠悵離居棄置寧不傷何以榮薄軀  
仰視高飛鴻安能與之俱



東江集金 卷二  
爲張祖望與伎往返

窓前晨明月燭燭照我幃佳人起嚴妝對鏡理容輝  
長嘆心內傷紺黛勿復施昨爲連理木今爲秋蓬飛  
恩好雖云篤恒恐會日希涕泪沾羅裳含情不能歸

其二

我君本令才榮名耀京國猥蒙采葑非賤妾生顏色  
妾如樹中草君如雲中翼鴻飛詎可追草枯誰復植  
離別毒我情涕泪沾胸臆黃金高如山明誓亮不忒

叙哀詩

凜凜高堂上北風日夕興衰草被庭階雨雪淒以澄  
素幃時飄揚夜長燭明燈孤兒憑棺啼零淚成寒冰  
倚廬不能寐一夕竟九升凡民無失所思之心蘊蒸  
悲吟寫我愁口噤非所能

其二

歲事一何促寒榛翳頽陽臥起縗經并草履踐雪霜  
登屋三悲號招魂來故鄉衣冠陳上坐琴書列兩旁  
凝思每移晷彷彿見容光拊心對几筵垂涕何浪浪  
永念平生親哀哉摧肺腸

其三

於赫我先考少齡振高策抱劍從軍征一呼多俘馘

東江集金 卷二  
功高未蒙賞幕府坐相索塵網非所營飄然愛山澤  
今胡早厭世壽命何逼迫杖履戢一棺幽明永乖隔  
幸茲令德存長布金與石

其四

西山何律律其旁有故廬荆杞生廣庭高臺成廢墟  
嘉木摧爲薪猿猴相追趨堂構猶彷彿飄零媿安居  
先志亮莫承含悲徒躊躇

其五

弱冠綜羣書暮齒樂養生變化古兵法進止通神明  
遺書半零落泣讀以屏營丹青猶未渝循環彌愴情  
夜深空舍中如聞歎息聲

其六

嘉林垂華實珍者惟橘柚我父實嗜好食必置左右  
纍纍如丹珠摘之盈懷袖回身奉殯宮馨香復誰餽  
含桃莫重結黃雀徒復擊盤餐雖盈案視此令心疚  
其七

惻惻欲何言含悲進總帷追慕耿不寐中心當告誰  
彷彿忽有睹前跪奉音徽壺觴間盤核不殊常燕私  
須臾輒復覺攬衣無所持長慟起躑躅淚下若縷縻  
仰頭思冠佩低頭思履綦但見衆星列精靈竟何之

東江集金 卷二  
晨風爲我鳴狐狸爲我馳徘徊坐待旦沉念發狂癡  
其八

春華生積雪微雲散青靄流年忽復易孤心發悲慨  
鮮民胡不死徒生爲患害辟若草與木留子去根蒂  
持杖不能起居憂實狼狽茫茫隔昏明心煩但蒙昧  
平湖縣北宮

當湖趨九龍浩浩勢東走飛觀聳城隅金碧耀林藪  
拾級升紫殿列柏寒更黝羽士燃金鶯仙人坐茅狗  
衣飄靈風迴掌啓滂雷吼言有聖水君道德時在手  
古劍凝雪光碧眼照星斗丹成入雲去我來胡不偶

水荷墮芳池金光老深牖佇望在鳥蹤烟霄日翹首  
春日齋中讀書

獻歲寡人事靜坐掩柴荆吾性樂文史不慕肥隱名  
惠風扇陽和已聞黃鳥聲河柳總翠絲園桃有紅英  
鶴衣顯原氏陋巷發顏生曠觀達妙理不以寵辱驚  
允氏垂遺軌詎止用代耕被褐以懷玉悠然獲我情

遊禦兒東寺

凌晨登佛樓眺此溼上縣荒城生古苔殘日映飛霞  
天寒野鶴起世遠浮雲變東風且停吹玉花清春殿  
爲韓秀才贈婦往返

東江集卷二  
其四  
如偶綿瓜豈大義要始終豈乏膏與沐寧爲悅者容  
予今適貴門高堂理縣桐珠璣耀流星錦袖垂彩虹  
豈知皮相士藜藿猶不克自顧無形顏低頭空舍中  
昔爲併肩獸今爲斷根蓬蓬使金石渝我恩媿未隆

其二

破鏡不復照敗非詎重取蓮子未經分豈知中心苦  
婦人若爲羅喬松相掌拒飄搖隨風揚非君嚙爲主  
絛綺寒不御滑柔餓亦吐涕淚常沾襟沉憂煎肺腑  
趙璧何時還奮起無毛羽我君不識察天日寧可觀

其三

立懦古有言鋸牙非可櫻伉儷不相庇勢屈難爲情  
報章感君厚憤激涕滿纓宋王亦可樂貧賤自韓生  
空房夜正長不寐以屏營河漢雖云邁經年會雙星  
伊余獨何辜零落如流萍此恨終天壤氣結無餘聲

其四

憶昔初結昏靜好友琴瑟豈意當乖離中道恩義失  
君情亮有常妾罪非當黜殺身豈所難纓冠望同室  
感子決絕言長往志念畢甘旨不可忘後婦宜迨吉  
蛾眉爲厲階北山慎羅罽我命須臾間信誓同皎日  
詣顯寧寺贈仁庵大師

東江集金 卷二  
踰嶺尚亭午到寺已暝烟回視所歷高崔嵬欲凌天  
陰岡地轉腴嘉禾常有年土民藝桑竹桃李夾長川  
卓錫有仁公開林始安禪自比常稷契埋照復誰憐  
齋鐘殷空堂崖月何娟娟花落得錦石雲開見紅泉  
金相非可觀寶化亦難傳塵襟愧許子何以酬嘉篇  
爲胡西蓮悼二

相月生涼風炎曦變金素寒蟬有餘聲虛室日將暮  
撫景獨悲窮懣結殊膠固明河淡微雲新桐泫夕露  
秋期亦非遙靈匹及茲度之子歸重泉抽哀欲誰訴  
傾耳聆淑音低頭見矩步昏明永乖隔何時復來晤  
二簪詎圖新求劍希得故沉思沾我襟零落感衰祚

郡中苦雨寄稚黃

清泉漫空塔洩雲蔽遙岑過盛不爲功赫曦變洪霖  
執熱衣忽寒未暝天已陰心愴車輻滯耳疲簷溜音  
所歡亦伊邇斗酒難共斟登樓以遊觀東望勞寸心  
陳詞冀表信因風動瑤琴何時睹靈景携手同高吟  
自紫薇山取徑至審山作

硤山秀若華雙峙分西東豈知連根株俱蟠厚地中  
當春士女遊車騎時相逢明妝艷朝日照耀金銀宮  
澄湖抱古市窈窕迴波通探奇樂登頓洞壑何玲瓏

東江集金 卷二  
改路遵平疇衣袂生微風草沒食其墓岩崑復高峯  
樹色映深翠石理同股紅靈標起中天豁達開心胸  
浮雲過我前恍若垂蒼龍錢唐四日微橋李寒烟重  
思歸更覽古悵望胡能窮

再過碧雲寺

危峯望不極福宇喜重臨地迴華幢湧松高畫拱陰  
潤牙掛覺水息機坐寶林咒鉢龍雲動鳴鐘花雨深  
塵埃增積懣風泉逐夙心經疑來白馬地想布黃金  
永辭塵縛侶常聞仙梵音

贈程雨三鄭迴萬

紈扇悲廩秋狐裘畏炎熱卞玉如截肪反以屢獻褻  
程生盼赤霄鄭子歌白雪牙曠豈遂希莫令弦柱絕

二子詩

祖望有琦行高帽露廣額戰勝體自肥虬髯壯如戟  
觀象夜不眠日射星漢碧自許廉藺徒超距時作劇  
龍精不在掌氣已凌疆場酒酣忽長歎似苦天地窄  
奈何耽詩騷隱義日夜索沉思頭拄案句出如拱壁  
依人常遠遊南北未煖席浮名走衆夫誤用良可惜

其二

稚黃天下才發跡東南陬羣錄有精義霄壤窮冥搜

當其用文采貴比珊瑚鈎和鳴覽德輝豈止悲麟遊  
嗟哉照乘珠抵鵲非所投玉琴何泠泠妙曲彈素秋  
誰言山水音能令聽者愁晚歲頌酒德痛飲被貂裘  
瓦釜震若雷坐使鐘呂休斯人日沉湎天地長悠悠

贈山曉大師

嘉陵何逶迤銅梁亦高聳蜀士盛文辭大師誠秀種  
研究通杳冥斷割稱智勇擔簦日觀化慧命今接踵  
投機類沙雨合道似膠鞏未覺芒屨卑詎駭紫衣寵  
悠悠白雲心棲山脫塵冗聲滅蟬成蛻絲盡蠶作蛹  
空色誰有無山羽孰輕重靈臺照八荒萬有咸震竦  
崔嵬黃鶴峯佛日臨繡栱桐魚懷好音石鼓陷丘壘  
雪深古松翠冰脫甘泉湧煩襟何由淨彌自增闢茸  
龍象睇不遙蛇鼠意常恐重禮多寶幢天花坐相擁  
泛碧浪湖至湖州西門詩

重湖會名區天水氣旁礴晶晶浪花翻淅淅雲色惡  
雪零峴山樹風撼春申郭危亭墮欄石古堦振檐鐸  
寒泛沙際鷗饑鳴林中鶴我行值仲冬涉險心駭愕  
豈無垂堂懼終匪破浪樂進舟臨深池浮光動丹腹  
鳥榜乘暝移龍笛中流作登遊企歐餘沉湎訪下箸  
旣傷心知希又苦塵事縛昔人願浮家牽船或有托

嗟予常軼軻晏歲尚飄泊

贈奚氏豫先

皎皎樓上月灼灼窓中女金波揚其輝玉質相容與  
緩步攬羅衣臨軒默無語北斗正闌干牽牛隔河渚  
迨吉思有行徽音竟遙阻盛年情莫當蓬首傷獨處  
揮絃不成章宛轉應鐘呂歌聲隨風揚飄搖逝何所

七言古詩

酒城歌

越來溪西有酒城吳王釀酒初得名吳王愛酒飲不  
止况復當時有西子朝挂錦帆太湖汜夕看明月深  
宮裏深宮明月影徘徊夜半吹簫更舉杯可憐火舉  
越兵入醉殺西施不起來漫言吳國綺羅歇鷓鴣亦  
啼越城闕十年薪膽徒爾爲莫惜香醪醉春月

題吳道子畫曲陽鬼歌

曲陽城高沙吐雲黃蒿塞眼白日曛長戈鐵馬城破  
裂天公不得稱將軍生爲妖賊死爲厲鳴狐含沙誰  
能制吳生貌此得無是真宰泣訴驚天帝酒酣落筆  
見鬼雄閃屍跳梁狀不同毛鬚肅颯儼嗥嘯銀戟手  
拓橫雙瞳屏障得此號奇絕坐客瞥見光熊熊殺氣  
朝凝太行黑神火夜照滹沱紅君不見倒馬關上山



東江集金 卷二  
嶽嶽鶉鴉井中水波濁愁雲不行鼓聲死白骨縱橫  
老鳥啄天陰雨濕啾啾鳴青燐熒熒晝吹角

夜雨曲

細雨冥冥暗春夕佳人轉燈向紅壁一更二更眠不  
成三四五更鷄已鳴雲鬟不亂金釵好坐看春花滿  
春草侍兒那解不曾眠誤道嚴妝起身早

陸娘曲

雙表戩金搖翠旌綵繩對繫萬眼明絲柳濛濛春雨  
晴人壓看場無一聲陸娘下馬神色好繡面粉香青  
鬢倒衆中直上誰得知却似驚鴻踏春草欲前且却  
意阿娜百丈游絲罥花朵須臾掠過衣香烈崩雨頽  
雲愁殺我纖纖紅屐金齒齊唱罷歸風立繡泥香塵  
撲面蜻蜓醉半天杏花春日西

秋懷引

沉香樓子青霞府芙蓉波響金魚舞美人小語教鸚  
鵡手伏雕欄聲未吐翠羽明珠釵一股纖羅秋蓋黃  
金縷鬢鬢寶髻羞眉嫵蘭思脉脉烟如雨低頭惆悵  
心無主淚滴紅苔階下土

銀餅井

井上古苔土花綠井底寒泉浸青玉井深索短空局

東江集卷二  
促照井不見夜燒燭銀餅女兒在何處銀牀輾轉天  
未曙弦摧管絕女巫去頭白老烏叫官署

秋月篇

南樓薄暮雨聲歇上客開筵對秋月樹影寒星鵲自  
飛簾卷明河蟾不沒須臾月彩夜氤氳爛爛朱霞映  
綠雲嫦娥並擁七輪扇青女爭懸百蝶裙七輪百蝶  
香霧濕萬戶千門歌笑急蓮花之炬光不紅竹葉之  
酒香初裊此時吹笛笛韻清此時燒香香氣橫秦箏  
不響吳歛罷誰爲我歌秋月明秋月團團照庭戶秋  
風蕭蕭傳鐘鼓邊頭健兒旗影寒深閨戍婦砧聲苦  
旗影砧聲總斷腸多少離人思故鄉螿蟬塞上霜偏  
早翡翠樓中夜正長人生富貴豈常在人生流年不  
相待初見金蟾麗北堂俄驚玉兔沉西海金蟾玉兔  
兩依依山桂微香露濕衣忽憶去年看月侶江南江  
北幾人歸

京峴行贈汪露繁

君不見赭衣三千鑿京峴長坑未成祖龍死南遊鞭  
石何其雄砮礮山中出天子君今遠來自潤州買船  
載伎西湖遊山色詎異甘露寺潮聲欲驚萬歲樓吳  
陵草花春再發臨安舊宮映江月古來興廢尚轉眼

東江集金 卷二  
何恠紅顏生白髮，段橋小娘色勝花。醉裏喚來雙鬢斜，當筵不樂復何意。柳絮漠漠飛寒鴉。

鑄鐘詞

安平寺前人如林，洪鑪高峙青山岑。百夫併力大風急，江潮夜吼蒼龍吟。須臾火舉若鳴鼓，銅精上結爲白虎。山亭藹藹紫霧橫，沙樹蕭蕭綠雲吐。挾鑪液走如長虹，魯般公輸用力同靈芝。大鶴炫奇色，巖巖驚覩燕支紅。丹梯巖業凌飛閣，輓轡千盤鳴鐵索。一聲盡識江南曉，落月疎星噪寒鵲。

答毛稚黃

昔我飲君酒，梅花落春雪。今我讀君詩，梅花又堪折。江南梅花落，更開開軒遲。君君不來鳳凰城，高白日暮延首空登江上臺。

春雪行寄馬侯玉

昨夜雪花映月飛，穿梅冒柳如颺絲。春燈零落歌吹歇，忽作寒風動天闕。窓曉不聞野鷄喚，開門見雪深尺半。坐客呼樽獸炭紅，隣姬掩袖鵲弦斷。此際懷人無會因，馬生高唱檀陽春。題書欲取新詞看，佇待冰開寄錦鱗。

東園觀妓卽席爲長句

東園雪晴月復華堂開綺席畫鼓過更催西曲六萌  
車迎取吳姬兼楚娃入簾半醉髻髮嬌若能語屏  
前花銀笙玉管彈琵琶能者節樂擊紅牙四筵蕩蕩  
靜不譁碧雲偷駐連朱霞言情訴怨非滌哇欲得郎  
顧時復差歌罷坐客咸咨嗟東江老夫淚若麻與卿  
偶聚俱天涯此土信美詎吾家今當盡歡酒更賒江  
城客散江月斜僮奴列炬驚林鴉

塘上黃昏曲

三星靨靨罨山翠夾路野烟喚春醉青雀朝遊不肯  
歸笑指銀煤綻雙穗烟銷月出紅酒凍燈花照月玻  
黎動美人高髻雲峩峩却放鷓絃唱囉嘖西陵草碧  
牽紫裙我欲同心難語君胸前寶袜鴛鴦帶玉刻連  
環似白雲

平遠樓歌贈稚黃

五月江風吹海榴主人觴我平遠樓文章可悲交可  
惜金杯酒似西湖白豐樂橋頭楊柳黃隨風搖曳生  
微涼樓上簾開月東起樓下九衢清似水長笛一聲  
雲不散華燈對結雙花燦君有新詩誰解歌豈得世  
上無韓娥芝田之曲亦瀟灑曲未能高和彌寡唱予  
和汝差不惡白眼世人恣諧謔嗟乎有我稱知音未

東江集  
卷二  
可輕擲龍脣琴

夢亡婦作

竹花離離雲滿庭銀煤曉墜金鸞屏帳底相看淚如  
水竟去一抹烟江青鸚鵡嬌惺動鈴索閒館垂簾月  
初落低頭憶夢杳難攀分明斷髮紅綃縛非邪是邪  
翩來遲綵繚羅衣響珠絡蒼天可老長江涸瑋瑁打  
金嫌我薄秋墳鬼火不照人白日松聲轉幽壑

柳烟曲

柳烟拂樓風旖旎火城日高喚春起蠻娘手摘焉支  
花坐卷銀河碧窓裏黃鶯學人闌眼啼露濕玉階芳  
草齊鬢多臂嬾古鏡黑欲語不語春陰低龜甲屏開  
山截業三十六宮天一抹蛾眉滿堂誰目成脉脉蘭  
思難自達巫陽峰頭雲不行越艷吳妖如有情天台  
失路劉郎苦萬樹桃花空月明

吳山曉望歌

吳山突兀氣磅礴下瞰錢唐水波惡第一峰頭雞始  
號羣星未落金盤高須臾赤燄射江水南北千山忽  
青紫海門堆雪蛟龍吼小兒看潮今白首嗚呼雪浪  
空崔嵬吳越興亡誰是非

橫潭曲贈張玉書

橫潭月出照玉沙橫潭藕葉香勝花花香露白人夜  
起彈罷瑤琴天似水錦鱗遠寄東江東豈應流水無  
知已四愁咏罷青萍吼休文六憶吾何有人生榮落  
亦轉眼痛飲工文俱不朽可憐不負潭上花潭水亦  
應變春酒

仇英美人出浴圖引

槐庭月上新涼早整頓輕容猶未好肯出蘭湯雪愈  
明鬟低竹簾雲將倒嬾結同心縷帶紅婀娜芙蓉颯  
晚風欲奏紫簫無氣力坐看銀漢下簾櫳

東江集鈔卷之三

仁和沈謙去矜著

門人俞士彪季璫  
姪聖清叔義較

五言律詩

飲馮徵君醉星池草堂

地僻遊人少堂深春日遲  
鹿麕鳴細草螿子坐晴絲  
蘿幌琴初動松舟席更移  
憐才有如此百里赴幽期

對雨作

詠罷登樓賦鈎簾獨坐閒  
野雲多出水寒雨欲沉山  
花柳添歸興風塵見悴顏  
江流真不遠春盡幾人還

石屋

石屋何年洞戎戎翳白蒿幽探恣盤礴遠矚見纖毫  
澗側奔猿墜林深乳雀高鐘聲殷萬壑松雨颯風濤

林亭早春

積雪新年霽空亭卷幔看鴈鳴沙凍解獺祭野池寒  
曉榻然松火風林整竹冠梅花千萬樹開落自江灘  
石鼓亭晚步

野徑愁行客危亭噪落鴉川虹秋抱日山鬼夜迷花  
墦古琅璫語碑殘屨屐斜桐魚焉可問博物媿張華  
過友人郊居

一水環村落蒼蒼雨後嵐草堂巢舊燕山女看原蠶  
幽興久逾熟新吟醉可採納涼時脫帽白日坐風潭  
泊嘉興南湖寄黃平立

孤客南湖夜蕭森八月初林莊聞吠犬船燭見跳魚  
白水荒城出丹楓古驛疎故人原有約延首正愁予  
晚眺

川原望不極孤客自登臺落日大荒遠平沙秋雨來  
青門生事渺白石壯心哀歸思西風後空憐作賦才  
湯鎮暝行

燠逼辭湯鎮驅車傍水濱土濠時飲馬沙店夜招人  
風急愁龍雨星寒雜鬼燐平生漂梗歎此際益沾巾

東江集 卷三  
春遊值雨

偶有尋春興經過竹塢西雨來山翠合客散野禽啼  
綠酒樽初罄明妝黛轉低繁花空滿日日暮是香泥  
銅雀妓

內舍餘香在西陵樹色新月流金氣  
曉霜冷翠華春  
總帳晶熒色靈衣綵繚塵更無斑竹淚迢遞怨南巡

晚晴懷陸景宣吳錦雯

小閣開簾望荒城暮雨收殘雷盤地脉芳草過山頭  
逐客悲蓬轉思君似水流何能同一醉秉燭散春愁  
雨過進艇硤石

野艇穿雙硤蒼蒼古木遮雲開龍見石溪靜鬼含沙  
孤枕消餘暑晴洲媚晚霞浩歌誰濯足雨外有人家  
送人之山東

君去遊齊魯誰憐泣路隅沙深埋馬腹風急斷人鬚  
鼓楫河流隘瞻雲嶽色孤蘭陵多美酒愁絕更須沽  
微雪

雪飛先集霰流艷照亭臺似露初能結因風更拂迴  
沾泥全比絮着幹忽驚梅多少金釵子傳呼翠幙開  
春日戲題酒樓

春江綠似酒吳女白如霜不信雙鬟重金釵十二行



東江集金 卷三  
柳花飄紫陌海燕語雕梁君看簾前日躊躇空斷腸  
南塘卽事

不畏沙河遠春晴自可憐白桑抽細葉黃柳變新烟  
酒苦村翁勸花堪野婦妍筍輿歸興懶斜日聽啼鶻  
經古墓作

荒冢誰家地低昂自古今鶴歸人世改柏暗鬼庭深  
白骨生春草青燐動夕陰百年皆異物雪涕一沉吟

宿湖南舟中同孫宇台

舟宿堪逃暑雷峰落日斜叩舷驚竹鳥携枕傍荷花  
佛火含青霧星光散白沙颯然秋爽集疑是共浮槎

過石目嶺

斷塢松林赤盤盤路幾層澗高猿喚飲徑狹馬愁登  
有竹皆停雪聞鐘不遇僧陰森迷去住落日叫蒼鷹  
雪後太湖眺望

頓舍憐裘敝遊觀愛雪晴朔風吹震澤斜日見菰城  
山翠當杯落沙禽向客鳴子皮何處去不那五湖情  
過惠上人靜室賦此

惠公已物化精舍轉荒涼烟入松花綠溪流荇菜香  
野雲生古塢山鳥宿禪牀何限存亡意空庭又夕陽  
許淮安墓

東江集卷三  
一代龍門望松雲闕古丘酒樽懷北海華屋慟西州  
樹密山鴉噪溪喧石馬秋不堪隣笛奏感舊獨生愁  
答宇台遲去矜不至之作

月黑鴈南逝天寒雨北來佳人秉華燭悵望臨高臺  
清酒詎能發新詩聊自裁東湖風浪急孤棹爲君開  
宿勞仲人宅懷李涇師

下榻當秋夕孤燈聞鴈初竹陰搖徑綠野月到牀疎  
酒熟憑誰進園荒可自鋤病餘時念汝愁見篋中書  
同張氏兄弟登臨平山

憑高試一臨絕壁俯千尋落日山水澹浮雲天地陰  
蕭條望古道忼慨起愁心不遇張華賞誰知石鼓音  
贈同學朱蘊斯

久別心應折重逢鬢有華論文聊永日貰酒過隣家  
月白松侵幕天寒鴈聚沙明年發西棹賞徧語亭花  
螢

螢火殊輕小飄飄含素輝似能添劍彩故爾入書幃  
雨濕光難定天明焰亦微羲和已策駕潛伏庶知幾  
聞陳章侯重至湖上

謂爾真名士依然老畫師王維原自病顧愷未全癡  
載筆孤城暮登樓素髮垂秋風興搖落剡棹竟何期

夜寄張祖望寓舍

憶汝空齋裏悲歌靜夜闌酒醒啼絡緯燈暗出豬獠  
落木山窓曙明星布被寒漫憐作客久詞賦且江干  
客散

柴門客散後寂寞興何如野笛臨風奏山燈隔岸疎  
長塗斷車馬斜日下衣裾詎念相思夜寥寥聞鴈初  
重遊海寧縣安國寺

重過安國寺一莖意蕭森海白孤城雨松青古殿陰  
霜鐘驚落木香積下饑禽回首十年事悲哉祗樹林  
酬張祖望毛稚黃月夜見懷之作

花外高樓月懷中隔歲書別離情未已搖落意何如  
清漢流光淺幽蘭著葢初多君共延首杯酒憶田廬  
讀陸驤武遺集

別君纔九載此夕對遺編坎坷終何用風流正可憐  
屋梁疑落月墓木自寒烟秉燭空揮涕含情那易眠  
同潘美含鼎湖眺望

步屨經村塢同行復有君湖晴常抱雨山翠不關雲  
漁浦褰裳過農謔隔水聞何當成小築散髮遠塵氛  
真娘墓

何處真娘墓荒丘露草中花開僧寺隱日落妓樓空

珠帳凋春雨，金蠶出曉風。未須悲玉骨，麋鹿走吳宮。

秋日郊行

獨愛清秋好，西郊最往還。鴈來收早稻，木落見寒山。  
田舍炊烟白，沙汀宿鳥閒。故人新釀熟，隨意叩柴關。

泊石門

南來戒依泊，烟市晚淒淒。沙白河鰲上，星寒水鶴啼。  
殘年悲遠棹，落月滿前溪。往事傳吳越，居人望裏迷。

大風發烏鎮

河鳴白日晦，挂席度西關。客思方淒惻，人言便往還。  
天低雪蕩水，雲沒洞庭山。寒色唯呼酒，空令惜悴顏。

太湖冬日贈尤盛二子

震澤逢冬日，羈棲最可憐。愁胡翻浦雪，薯蕷出湖田。  
路塞青峰度，天寒濁酒偏。殷勤還二子，聯榻頓忘眠。

東塢

天晴扶杖去，東塢滿棠梨。隴麥秀初結，山蠶出欲齊。  
短松生黑燒，枯骨露黃泥。念此能無淚，春風落日低。

孟姜泉精舍

小築堪幽憩，殘僧解送迎。雲來金像濕，霜降石泉清。  
苦茗添詩興，寒花亂旅情。坐深迷去住，松月露微明。

宿鍾雪園湖樓

東江集 卷三  
喜客迎孤棹逢君醉北樓沙明遵鴈渚月白見龍湫  
疊鼓連城動疎燈隔幕幽誰憐十載事不寐憶前遊  
壬辰元日示聖昭

悲吾逢正旦憐汝未成人書卷時休曠征徃歲轉頻  
城雲沙鴈白山雪野梅春努力耕耘早衡茅莫厭貧  
寄張祖望

烟合青林暝山低白日斜採桑蠶妾路種竹野人家  
犬吠聞深巷鷗眠傍淺沙幽期何日到書札憶天涯  
亭村卽事

舟行溪路遠烟色晚霏霏唼雨魚爭出蹲沙蟹正肥  
田家蒸稻熟村女采菱歸風土殊堪樂幽棲素志違  
泊禦兒

候火悲遊客商船卽比隣柳深孤驛雨燕入小城春  
白髮無新句青衫是舊人夜來重此泊沙月對沾巾  
會稽姜桐音寄待刪集

姜生於越秀書到及秋風吟歎孤燈夕寒霜滿桂藜  
虛懷推敬禮高蹈自梁鴻夜雪堪乘興何時過剡中  
宿資福寺

偶憩招提境荒村草徑斜樓臺知佛地鷄犬卽田家  
卷幔聞春雨懸燈集暮鴉老僧偏佞客隣酒夜能賒

自安隱東山至大慈院作

背寺尋歸路藤花岸葛巾松青雲護佛山黑雨隨人  
涉澗泉聲苦穿沙藥草新翻令幽興熟頓欲買東隣  
聞張祖望館吳錦雯宅有寄

二難誰汝及脫畧更何嫌五月南風至論詩動紫頰  
池荷花隱約竹雨暮廉纖悵望無由見停雲日倚簾  
病中胡西蓮三過草堂余不得見

幾度勞君詢經時少客來才名真是幻交誼至今哀  
檻筍衝泥出簷花對雨開病多成嬾傲何日共銜杯  
過武昌紫蓋禪師故院

方丈燈明裏凄然獨憶君虛寮猶映竹斷堦自穿雲  
茂德塵中少新詩沒後聞秋花徒滿眼弄影日紛紛  
送王生之嘉興

落魄歎王生琴箏字字清自言不得意歲暮此孤征  
船艤冰膠浦鷄號雪滿城陽春一惆悵瓦釜正雷鳴  
重遊天寧寺

霽色開禾郡春沙出梵宮樓臺紅日上松檜綠烟中  
金相臨南浦銅烏嘯北風病餘纔一到遊賞憶諸公  
贈項孔彰

愛汝五松圖今來是老夫風塵留筆墨遊覽歷江湖

東江集 卷三  
惜別花重笑論文酒自沽盛名多坎壈君已泣窮途  
望智標塏雨不得上

審山多寶塏一半白雲封日黑棲羣雀天陰挂獨龍  
勝遊真是嬾遐矚有誰從歎息孤篷夜寥寥聞暝鐘  
吳堰

松艇愁膠淺東溪觸暑過雲生時挾電雨注忽成河  
野渡喧鵝鴨幽居障薜蘿歸來衣盡濕新月夜涼多  
寒甚飲張氏園

林園憑古笕雪淨紫藤梢躡屐迷花徑當筵墜鵲巢  
丹青聊自活泉石有心交不厭衝寒客呼兒市酒殺

硤上春行

春遊古硤川紅寺隔晴烟花重鶯隨折風低柳忽眠  
鷄豚誇社稔脂粉助人妍日暮溪頭雨匆匆返畫船  
再遊西山惠力寺

何處紫微洞招提此重經亂鶯臺閣晚垂柳市橋青  
懷古愁難釋隨緣法可聽上方貪縱目沙日下朱扃  
南村唐丈述倒馬關舊遊

唐生少倜儻邊塞日躋攀白刃磨風水紅旗卷雪山  
臨崖詩忽就明火獵初還跼踖今何事雄談髻已斑  
曉發鎮南自許巷至萬家渡舟中作

東江集 卷三  
理楫衝星去蕭蕭此倦遊幾家纔聚族盡日不逢舟  
村靜知蠶月天寒過麥秋征途還羨汝擾攘欲何求  
五月過黃道湖感舊

昔年曾此泊隄樹雪模糊昨夜南風競扁舟復渡湖  
渚花翻浪出水鶴向人呼衰老今安適真悲歲月徂  
同叔度遊覺王寺

古殿生秋爽同君眺落暉雲寒雙樹暝鐘響一僧歸  
近市悲喧競安禪遠是非東來常問渡飄泊幾沾衣  
平泉小集

乘暇旃林集晴秋秋可憐竹涼搖斷壑花雨沸新泉  
世事看雲坐禪心枕石眠塵容堪洗濯對此欲忘年  
九日風雨登廣巖寺樓

古刹開西鎮登遊已暮鐘殿秋鳴怖鴿湖雨截歸龍  
鏡裏霜初得樽前菊再逢濕雲飛不盡日斷最高峰  
程雨三鄭迴萬晚過草堂

病中逢二妙愁裏過重陽竹晚雲開日籬秋菊有霜  
君詩徒慷慨吾意轉蒼茫莫厭相過數幽期幸未忘  
曹射侯招飲卽席有作

曹子吾師表招携興轉新江湖春作客雷雨夜留人  
密坐論心苦清歌灑淚頻相逢真不易花爛語兒津



安隱渡河卽事

古寺鳴鐘晚輝輝  
日斜潰隄時避水  
改路恰逢花  
小艇魚爭躍  
春衣酒更賒  
勝遊君自惜  
隨意宿山家  
春暮郊行同潘雲赤作

東麓尋精舍  
偕遊愛爾才  
村晴蠶子出  
風暖豆花開  
白骨藜新隴  
丹爐圻古臺  
存亡無限意  
山笛暮吹哀  
月華菴訪石公不遇

雙樹疑無路  
千峰自掩關  
杯浮出遠浪  
燈曉宿春山  
禮塔諸天靜  
鳴鐘丈室閒  
探幽須異日  
坐穩不知還  
宿朱子渠宅

舟返嚴城暮  
燈明別墅開  
微雲翳淡月  
新竹淨纖埃  
村闌蠶俱熟  
宵闌鳥競回  
真堪共耕鑿  
野老莫嫌猜  
贈毛玉斯

唱我黃花曲  
傾君竹葉樽  
塵飛風蕩燭  
天曉月當門  
顧誤驚新意  
知音愛細論  
明朝南浦別  
執手奈銷魂  
新竹

可愛吾園竹  
青青勝舊時  
殷雷曾解籜  
小雨欲垂枝  
檻晚寒聲動  
簾低暝色遲  
凌霄質已具  
威鳳倘來儀  
南村尋程雨  
三徐格王不遇

二子下幃處  
吾儕觸暑過  
火雲偏塞路  
沙草欲平河

東江集金 卷三  
避跡悲鴻逝論交重雀羅幾時還見汝散髮臥崑阿  
馬子玉過訪兼得令兄鳴九書

獻歲多佳日西山又早春花開逢令弟書到憶情親  
夜月江暄枕朝嵐雪照人何時發東道爛醉鼎湖濱

春曉偶成

倚枕看山色開簾愛曉晴客愁偏對雪春夢不離鶯  
天地悲岐路詩書誤此生不知鴻與鴈底事厭南征  
同沈叔度勞荀日遊藥師庵時罌粟盛開

精舍東溪上春籬石徑斜山青能照佛雨小若憐花  
雅集休輕負餘生洵有涯坐深鐘磬寂歸路及昏鴉

湖南值雨

晚雨來何急湖行道路艱黑雲低覆地斜日遠含山  
恍挾雙龍鬪翻憐一鷺閒到庵天忽霽倚杖聽潺湲  
安隱暮歸卽景

東麓吾歸路空林暮色幽竹晴猶帶雨山響忽兼秋  
僻性耽佳句無心得勝遊後棲鴉萬點磔磔噪荒丘  
西山道中同潘雲赤

嶺西遵坦道風爽失炎威密菁都捐蓋遊蜂故入衣  
鴉鳴當冢樹人語隔林扉共有探奇興誰言舊侶稀  
登吳山絕頂

東江集卷三  
躡屐凌飛磴遊觀氣鬱蒼天圍吳嶠聳江轉越臺荒  
遺鏃沉秋草離宮過夕陽髡衰風更急憑弔欲沾裳  
訪自上人不值

曳杖南屏遠沿湖石徑斜雷峰翻夕照風葉似春花  
飛錫雲無定郵詩日已賒塵中推淨德相憶髡添華  
歲暮金華葉具京寄新集至

葉子詩名大遠遊興益新離懷悲卒歲此調是陽春  
綠酒堪邀月黃精不染塵洞天應可到吾意欲尋真  
曉起書事

推枕燈猶燦愁思詎可裁髣髴塵內收雷電雪中開  
這典無過醉逢人莫論才漫言常寂寞春已在庭梅  
劉園妓集

姝麗誰令至喧呼我更豪翠盤堆雪藕雲髻綻緋桃  
斜日銜山速東風向晚高斯遊須秉燭拚得困香醪  
出鶴峰庵憩留月泉

精藍春已半物外恣盤桓壁峭雲應礙泉幽月更寒  
煮茶然野竹脫帽坐風湍底事忘歸去深知行路難  
贈揚州陸姬

妬極應憐汝情親却憶君夢來疑帶雨歌罷不飛雲  
凝淚臙脂壓銷香蛟蝶裙酒闌休訴恨嗚咽詎堪聞

東江集 卷三  
題雲濤法師泉眼

雲公卓錫地泉脉沸南峰潔並高人愛香堪古佛供  
路幽開萬竹夜黑吼雙龍滾滾疑翻雪寒聲亂填鐘  
集鼎湖僧舍

勝遊不覺遠精舍傍重湖霜冷蒹葭落天高鴈鶩呼  
息心尊爾佛遣興得吾徒寶鼎今何所光輝定有無

燈社酒會

擾擾千家住匆匆五夜過月明華燭爛年稔醉人多  
感舊竊悲此看春奈老何少年勿遽起吾意欲長歌  
十七夜雪

醉中俄集霰旋舞濕華因燈照千峰白人憐五夜春  
玉杯寒氣遠金箭漏聲頻秉燭渾忘寐庭梅更可親

雪中寄郎季千

盡日雪兼雨白頭憐汝寒交情老愈切詩句好誰看  
病肺偏耽酒顏顏嬾着冠杏林諸子弟曾解唱幽蘭  
月夜同朱子渠泊五龍橋

白月古龍湫相憐竟夜愁此行非入洛何處可依劉  
水鶴驚船燭湖星動戍樓粲粲堤上柳烟色似杭州

新霽

杖出雲俄散鐘鳴日已斜水禽翻白羽雪柳動黃芽

東江集金 卷三  
苔積仙人井橋通處士家同行莫吹笛當路有梅花  
贈張紫宇別駕

奏笛移輕舫開筵傍碧溪暮蟬猶咽樹新藕不沾泥  
企德真誰及忘年可共携興來秋月上沉醉更扶藜

西郊春興

仙觀俯嶙峋西郊縱目頻綠樽聊遣日白髮易傷春  
風起花隨馬山空鳥喚人還丹君莫問沉醉見吾真  
雪中讀陸蓋思集却寄

把卷情偏切登樓望轉遐曉看千樹雪春到夾城花  
相憶書難寄孤吟酒更賒扁舟欲乘興何處戴逵家

懷宋君章客燕中

燕地寒應苦憐君此倦遊亂雲生碣石七月凍蘆溝  
久客悲題柱依人醉倚樓揣摩知己就還敝黑貂裘  
宿長興田家

薄醉田家酒難堪旅客情不眠知夜永月落故鄣城  
拱鼠窺燈出飛鳥繞樹鳴思家兼憶友一夕并沾纓  
遊清涼寺

共訪招提境扶藜路幾重山高時戴雪寺古不聞鐘  
欹樹垂蜂蜜當階見虎踪客程能暫住明發度西峯  
答張露森

分携踰十載別久見情親白髮難容汝青樽不負人  
緘詩仍遇雪讀易屢經春若問相思苦愁隨柳色新  
晚涼潘雲赤王升過草堂分韻

雨過草堂暮新涼把袂同暗雲時掣電空翠欲生虹  
徑沒知吾嬾詩成愛爾工茗餘興不淺歌罷燭花紅  
舟過鳳凰橋

雲白孤帆暮江清五月秋鳳凰橋下水還似昔年愁  
勲業羞臨鏡文章祗敝裘重來空灑泣舊侶半荒丘  
秋夜觀漲

登橋同眺望惆悵意難論天漢低縈樹秋江直到門  
魚龍爭出沒魑魅喜黃昏沆漭鹽州道誰招楚客魂  
不寐

今宵何太永惆悵坐空幃街鼓聲初動窓燈焰已微  
病多猶旅食寒至憶秋衣賢主情何厚淹留未許歸  
晚坐有感

獨坐草堂靜庭空落葉聞暮烟終作雨秋日不離雲  
孤冢啼新鬼雙花憶故羣世情緣底事垂老見紛紜  
崔祠望雨

古祠朝望雨不厭客衣霑水霧搖紅燭峰雲上畫簾  
孤吟遊興嬾薄醉旅愁添裊裊南庭竹真堪盡日淹

西陵

西陵携妙伎春晚稱幽期坐久湖烟淡歌清野日遲  
紫釵搖燕子黃酒潑鶯兒蘇小風流盡空餘松柏枝  
夏日舟行

沙路牽舟苦炎蒸五月初蛇騰偏隱霧水濁反無魚  
不厭孤踪遠真愁兩髻疎北窓風竹裏高枕憶吾廬

觀荷

散髮扁舟上溪蓮獨夜看露深空翠濕花靜水香寒  
却扇思携枕銜杯嬾着冠月中何處女歌罷已更闌  
訊洪昉思臥疾

五月東城別思君未敢言學應同武庫病豈類文園  
池淺紅蓮墜簾空白鳥翻幾時能進艇重與問桃源  
得許潛飛手札因知陳亮章之計

西嶺開新爽吾懷苦未舒那知千點淚并在數行書  
金石論生死塵埃任毀譽遺文知滿篋收取莫教疎  
宿吳山卽事

湖藕時堪薦香醪夜不聞暑中貪白月城裏宿青山  
客興已如此吾遊底未還不眠思往事空使髣毛斑  
竹中夜飲

豪飲竹林中南廂列炬紅揀枝憐噪鵲焦翼恠飛蟲

東江集卷三  
吹笛冠俱脫論文盞易空主人情爛熳缺月上簾櫳  
秋日重過伯揆山林

每憶吾宗秀橫河小築新鳳毛誠足賞龍性豈能馴  
市遠門依水天寒竹覆隣暇時重過問披豁見情真

其二

石轉藏深徑橋低度曲池高懷容客過幽意少人知  
水落殘荷倒籬荒野菊披性耽淳樸處軒冕自當時

其三

白晝窓臨月高秋雨過城開軒堪宴坐桑落爲君傾  
要客揮銀管呼童鼓玉箏新歌聽不厭樂極轉傷情

其四

頗類東湖宅林居事事幽洞含山底樹池映竹間樓  
綠羽翻鸚鵡丹砂綴石榴故鄉不可問憑眺迴添愁  
郡中寄王升

里閉相過數吾衰髣已華論詩媿匡鼎載酒識侯芭  
勇進應無敵浮沉莫浪嗟歸期近重九還與醉黃花  
送張玉書歸唐棲

放逐偏才子攀留有故人綠樽全迸淚清唱暗縈塵  
雨黑橫潭遠秋高落鴈頻未知相見日書札漫經旬

新橋



東江集卷三  
一歲屢經此歸舟已暮鴉童山當驛路野火入人家  
塵網心原苦田居興頗賒自今遠城市吾病久烟霞  
西郊卽事同潘雲赤唐弘基男聖昭

村居驚物候宴賞及茲辰山翠偏宜雪梅含欲待春  
緩行吾意適佳句客愁新酒德元堪頌追遊莫厭頻

東關曉行

及關猶未曉行李去匆匆水涸人趨陸天寒馬畏風  
日生鄉樹外春動客愁中于役何時已飄飄類轉蓬  
雨

河涓人憂早山青雨弄春未能滋宿草僅足灑微塵

魚子隨萍脫鶯兒繞樹頻發生全賴汝安得慰斯民  
長橋宴集觀荷

小宴喜君同高粱烟靄中花沾秋露重月照夜潭空  
青雀停蘭漿金壺注碧筒擁鈎魚不上時戲葉西東  
登蝦蟇峰是胡御史墓

烏石湧千尋寂寥雙澗深昔人埋骨地石馬在空林  
野日慘無色天風時一吟吾生何不樂暝立看歸禽

晚坐

東堂臨曲沼獨坐有誰親草暖微留雪梅香暗入春  
遠遊無奈老薄醉亦忘貧詩就聞鶯語虛檐月色新

悼石公兼呈拙禪師

高風今復見此地昔曾遊十載江南夢幡幡野麥秋  
道應尊惠遠詩足繼湯休叙舊成悲感斜陽下古丘

石公遺像  
吳昌碩印

